



Trideset i osmi hadis: Vrijednost sure Ihlas i Mu'avvizetejni (sura El-Felek i En-Nas)

Prenosi se od Ebu Se'ida El-Hudrija, radijallahu anhu, **da je neki čovjek čuo drugog da uči KUL HUVALLAHU EHAD (Reci: „On je Allah, Jedan.“ El-Ihlas, 1) i da je to ponavljao. Pa kad je došao Allahovom Poslaniku, sallallahu alejhi ve sellem, spomenuo mu je to, a sam ga je vidio malim djelom, pa mu je Allahov Poslanik, sallallahu alejhi ve sellem, rekao: „Tako mi Onoga u čijoj je ruci moja duša, ona (ta sura) zaista vrijedi trećinu Kur'ana.“ (El-Buhari, Ebu Davud, Ahmed i drugi).**

A 'Urve prenosi od 'Aiše, radijallahu anha, da je rekla: **„Allahov Poslanik, sallallahu alejhi ve sellem, bi svake noći, kada bi legao u postelju, skupio dlanove i puhnuo u njih i proučio KUL HUVALLAHU EHAD (Reci: „On je Allah, Jedan.“ El-Ihlas, 1), KUL E`UZU BI RABBIL-FELEK (Reci: „Utječem se Gospodaru svitanja.“ El-Felek,1) i KUL E`UZU BI RABBIN-NAS (Reci: „Utječem se Gospodaru ljudi.“ En-Nas,1). Zatim bi rukama potrao ono što može od svog tijela. Počinjao bi od glave, lica i prednjeg dijela tijela. Činio bi tako tri puta. (El-Buhari, Ebu Davud i drugi).**

Pojašnjenje:

Ovo poglavlje tretira pitanje vrijednosti sure Ihlas, Felek i Nas.

Sura Ihlas je mekanska sura i ima četiri ajeta. Ona govori o svojstvima Allaha Uzvišenog, Svevišnjeg, Jednog i Jedinog. On je taj Koji poseduje sva savršena svojstva i osobine, Vječni, Neovisan je o Njegova stvorenja, Čist je od svake manjkavosti i nesavršenosti, ne postoji ništa što mu je ravno, nema sudruga, niti postoji iko kao On. Ova sura je došla kao dokaz protiv kršćana, koji govore da je Allah jedan od trojice, kao i protiv mušrika, koji smatraju da Allah ima potomstvo i djecu, neka je Uzvišen Allah i vrlo visoko iznad onoga što oni govore.

Nazvana je „Ihlas“ tj. iskrenost, jer je ona prožeta Allahovim svojstvima i zato što otklanja širk od onoga ko je uči.

Riječi Poslanika sallahu alejhi ve sellem: **„Zaista ona vrijedi trećinu Kur'ana“** obuhvataju tri opšta značenja:

Prvo, obavijesti o tevhidu. Kur'an govori o Allahovoj jednoći u rububijetu, uluhijetu i Njegovim lijepim imenima i svojstvima, iskrenosti u obožavanju Njega Uzvišenog, negaciji širka i pridruživanju Allahu druga, supruge i djece.

Drugo, obavijesti o stvorenjima. Kur'an govori o prethodnim narodima koji su imali svoje

poslanike, o uništavanju nepravednika i pomaganja sljedbenika tevhida protiv nevjernika koji su se borili protiv njih, o dženskim užicima koje je Allah obećao bogobožnima i o dženskoj vatri koju je obećao nevjernicima.

Treće, propisi. Kur'an govori o šerijatskim propisima iz fikha, ibadeta, i postavio je ljudima propise po kojima trebaju da postupaju, i životni sistem njihovog dunjalučkog života.

Ovo nam objašnjava značenje riječi Poslanika sallahu alejhi ve sellem: „**Zaista ona vrijedi trećinu Kur'ana**“, jer ona obuhvata jednoću Gospodara Uzvišenog i spominje Njegova imena i svojstva.

SURA FELEK

Medinska sura, sadrži pet ajeta.

Njena tematika se odnosi na poučavanje robova kako da traže utočište kod Allaha Jedinoga od zla Njegovih stvorenja, javnih i tajnih, od zla jutro kada se pojavi, od zla noći kada tmine prekriju, od zla sihra i sihirbaza, od zla svakog zavidnika i od svakog zla, uopšteno.

SURA NAS

Ova sura je medinska, neki kažu mekanska. Ima šest ajeta, sa surom Felek zajedno čine „**Muavezetejn**“.

Srž ove sure čini podučavanje roba načinu traženja Allahove zaštite od zla Iblisa i njegovih pomagača od ljudskih i džinskih šejtana, koji zavode ljude, unošenjem sumnji i uljepšavanjem zablude.